

PRAVILNIK

O SADRŽAJU ZAPISNIKA O PRETRESU STANA I DRUGIH PROSTORIJA, POTVRDE O ULASKU U STAN I DRUGE PROSTORIJE I POTVRDE O UPOTREBI SAOBRAĆAJNOG SREDSTVA I SREDSTVA VEZE

I - OPĆE ODREDBE

Član 1.

Ovim Pravilnikom propisuje se sadržaj zapisnika o pretresu stana i drugih prostorija, potvrde o ulasku u stan i druge prostorije i potvrde o upotrebi saobraćajnog sredstva i sredstva veze u Zavodima za izvršenje krivičnih sankcija, pritvora i drugih mjera Bosne i Hercegovine (u daljem tekstu: Zavod).

Odredbe ovog Pravilnika primjenjuju se i na odgojno-popravne ustanove, ako posebnim propisima nije drugačije određeno.

Član 2.

Definicija pojmova

Pojedini izrazi upotrijebljeni u ovom Pravilniku, ako nije drugačije određeno zakonima Bosne i Hercegovine, imaju sljedeće značenje:

- a) pod "stanom" u smislu člana 51. stav 1. Zakona o krivičnom postupku Bosne i Hercegovine, smatraju se u prvom redu prostorije namijenjene za redovno stanovanje, zatim razne sporedne prostorije (npr. praonice, sušionice, drvarnice, podrumi, garaže, tavanice itd.) bez obzira, da li su spojene stanom ili ne, a također i pokretni prostori koji služe za stanovanje (npr. kabina na brodu, stan u automobilskoj prikolici, montažne kuće itd.),
- b) pod "ostalim prostorijama" smatraju se razne staje, kolibe, vikendice, kao i drugi prostori udaljeni od stana, poslovne prostorije i saobraćajna sredstva kao što su automobili, brodovi, čamci, željeznički vagoni, avioni i sl.,
- c) "pravno lice" su sva lica koja su kao takva definisana u članu 1. tačke 10. Krivičnog zakona Bosne i Hercegovine, člana 20. stav 1. tačke "i" Zakona o krivičnom postupku Bosne i Hercegovine i članu 2. stav 1. tačke "f" Zakona Bosne i Hercegovine o izvršenju krivičnih sankcija, pritvora i drugih mjera,
- d) "odgovorna lica" su sva lica koja su kao takva definisana u članu 1. tačke 5. Krivičnog zakona Bosne i Hercegovine,
- e) "saobraćajno sredstvo" je svako prevozno sredstvo namijenjeno za kretanje, kao što su motorna vozila, bicikl s motorom, bicikl, traktor, putnički automobil, trolejbus, teretno vozilo, kombinovano vozilo, zaprežno vozilo, odnosno sva saobraćajna sredstva određena Zakonom o osnovama bezbjednosti saobraćaja na putevima kao i drugim zakonima iz oblasti saobraćaja Bosne i Hercegovine,
- f) "sredstvo veze" je svako sredstvo pomoću koga se vrši prenošenje vijesti na daljinu (npr. izvještaja, obavještenja, poziva, slike itd.), putem radio-talasa, putem elektriciteta, prenosom slike, telefonom, teleprinterom, telegrafom, mobitelom kao i putem svake druge akustičke, elektromagnetske, električne, elektronske, optičke i satelitske naprave, kao i svako drugo slično sredstvo, određeno zakonima Bosne i Hercegovine iz oblasti sredstava veze ili telekomunikacija.

II - PRETRES PROSTORIJA I ODUZIMANJE NEOPHODNIH SREDSTAVA

Član 3.

Ovlašteni zavodski službenik može i bez naloga za pretres ući u stan ili druge prostorije i u njima izvršiti pretres kada je to potrebno radi pronalaženja i hvatanja lica koje je pobjeglo iz Zavoda ili koje je prilikom sprovođenja pobjeglo i sklonilo se u stan, odnosno drugu prostoriju.

U slučaju ulaska u stan, odnosno drugu prostoriju, neće se sastavljati zapisnik, nego će se korisniku, odnosno vlasniku stana ili prostorije, odmah izdati potvrda u kojoj će se naznačiti razlog ulaska u stan, odnosno druge prostorije.

Ako je izvršeno pretresanje stana, odnosno prostorija, sastavit će se zapisnik.

Pretresanje se može izvršiti i bez prisustva svjedoka, samo ako nije moguće obezbijediti njihovo prisustvo.

Član 4.

Radi sprečavanja bjekstva, hvatanja odbjeglog lica koje se neposredno goni, kao i radi prevoženja u najbližu zdravstvenu ustanovu lica koje je ranjeno prilikom upotrebe vatrenog oružja, ovlašteni zavodski službenik ima pravo da se posluži saobraćajnim sredstvima i sredstvima veze do kojih može doći, ako to ne može izvršiti na drugi način.

O upotrebi saobraćajnog sredstva i sredstva veze izdaje se potvrda vlasniku saobraćajnog sredstva ili sredstava veze radi naknade troškova.

III - ZAPISNIK O PRETRESANJU STANA I DRUGIH PROSTORIJA I POTVRDA O ULASKU U STAN I DRUGE PROSTORIJE

Član 5.

Zapisnik o ulasku u stan i druge prostorije

Ako je izvršeno pretresanje stana i drugih prostorija sastavlja se zapisnik u skladu sa članom 34. stav 3. i 4. Zakona Bosne i Hercegovine o izvršenju krivičnih sankcija, pritvora i drugih mjera (u daljem tekstu: Zakona), i odredbama ovog Pravilnika.

Zapisnik o pretresanju stana i drugih prostorija potpisuju ovlašteni zavodski službenici koji su sudjelovali u pretresanju stana i drugih prostorija, vlasnik, odnosno korisnik stana ili drugih prostorija, odnosno njegov predstavnik.

Ako je izvršeno pretresanje prostorija pravnog lica, zapisnik potpisuje odgovorno lice pravnog lica.

Zapisnik potpisuju svjedoci ukoliko su bili prisutni pretresanju. Zapisnik se vodi na obrascu broj 1. formata "A-4".

Član 6.

Potvrda o ulasku u stan i druge prostorije

Potvrda o ulasku u stan i druge prostorije izdaje se vlasniku odnosno korisniku stana i drugih prostorija u skladu sa članom 34. stav 2. Zakona i odredbama ovog Pravilnika.

Potvrdu izdaje i potpisuje ovlašteni zavodski službenik koji je ulazio u stan i druge prostorije.

Potvrdu potpisuje i vlasnik odnosno korisnik stana i drugih prostorija u koje je ulazio ovlašteni zavodski službenik.

Potvrda se izdaje na obrascu broj 2. formata "A-4".

IV - POTVRDA O UPOTREBI SAOBRAĆAJNOG SREDSTVA I SREDSTVA VEZE

Član 7.

Potvrda o upotrebi saobraćajnog sredstva i sredstva veze

Licu čije je saobraćajno sredstvo ili sredstvo veze upotrijebljeno u skladu sa članom 34. stav 5. i 6. Zakona, izdaje se potvrda.

Potvrdu izdaje ovlašteni zavodski službenik koji je upotrijebio saobraćajno sredstvo odnosno sredstvo veze, u skladu sa članom 34. stav 6. Zakona, i odredbama ovog Pravilnika.

Potvrdu potpisuje ovlašteni zavodski službenik koji je upotrijebio saobraćajno sredstvo odnosno sredstvo veze, kao i vlasnik odnosno korisnik saobraćajnog sredstva ili sredstva veze.

Potvrda se izdaje na obrascu broj 3. formata "A-4".

Član 8.

Obrasci broj 1, 2, 3, odštampani su uz ovaj Pravilnik i čine njegov sastavni dio.

Član 9.

Odobrenje za štampanje obrazaca iz ovog Pravilnika izdaje Ministarstvo pravde Bosne i Hercegovine.

V - PRIJELAZNE I ZAVRŠNE ODREDBE

Član 10.

Ovaj Pravilnik stupa na snagu danom donošenja, a objavit će se u "Službenom glasniku BiH".